

**Kort- aamma Matrikelstyrelsi pillugu inatsisip allannguutaanik inatsimmi § 1-ip aamma (paasissutissat ilaannik killeqanngitsumik atuisinnaatitaaneq, immap itissusaanik uuttortaasarnerup isumagineqarnissaa aamma styrelsip taaguutaata allanngortinneqarnera pillugu) inatsisit allat assigiinngitsut Kalaallit Nunaanni atuutilersinneqarnissaannik peqqussutissatut missiliuut**

UAGUT MARGRETHE AAPPAAT, Guutip saammaanneragut Danmarkip Dronningia, nalunaarpugut:

Kort- aamma Matrikelstyrelsi pillugu inatsisip allannguutaanik inatsimmi aamma (paasissutissat ilaannik killeqanngitsumik atuisinnaatitaaneq, immap itissusaanik uuttortaasarnerup isumagineqarnissaa aamma styrelsip taaguutaata allanngortinneqarnera pillugu) inatsisit allat assigiinngitsut pillugit inatsimmi nr. 1392-imi 23. december 2012-imeersumi § 7, imm. 2,<sup>1</sup> naapertorlugu aalajangersarneqarpoq:

## § 1

Kort- aamma Matrikelstyrelsi pillugu inatsimmi nr. 749, 7. december 1988-imeersumi, inatsimmi nr. 313, 5. maj 2004-imeersumi § 1-kkut aamma nalunaarut nr. 1062, 3. november 2004-imeersukkut allannguuteqartinneqartumi makku allannguutigittinneqassapput:

1. Inatsisip *taaguutaa* imatut oqaasertaqartinneqassaaq:

### »Geodatastyrelsi pillugu inatsit«.

2. Inatsimmi sumiluunniit tamani »Kort- aamma Matrikelstyrelsi« imaalillugu allanngortinneqassaaq: »Geodatastyrelsi«, aamma »Kort- aamma Matrikelstyrelsip« imaalillugu allanngortinneqassaaq: »Geodatastyrelsip«.

3. § 2, *stk. 1, nr. 1-imi*, »kiisalu« kingorna ilanngunneqassaaq: »uuttortaaneq aamma«.

4. § 2-imi ilanngunneqassaaq *imm. 3-tut*:

»*Imm. 3.* Geodatastyrelsi oqartussanik allanik oqaloqateqareernermigut paasissutissaatiminik toqqortaqarsinnaallunilu siammartiterisinnaavoq.«

5. § 4 kingorna ilanngunneqassaaq:

»§ 4 a. Kalaallit Nunaata imartaani immap itissusianik uuttortaasarneq taamaallaat ingerlanneqartassaaq Geodatastyrelsip akuersineratigut. Uuttortaareermermi uuttortakkat pillugit paasissutissat tamarnik assilineri Geodatastyrelsimut tunniunneqartassapput.

*Imm. 2.* Imm. 1 malillugu aalajangikkat allaffissornikkut oqartussaasunut allanut naammagittaalliutigineqarsinnaanngillat.

---

<sup>1</sup> Aalajangersagaq imatut oqaasertaqarpoq: ” Inatsit kunngip peqqussutaatigut tamakkiisumik ilaannarmilluunniit Savalimmiuni aamma Kalaallit Nunaanni atuutilersinneqarsinnaavoq tamanna Savalimmiuni aamma Kalaallit Nunaanni pissutsit ajornartingippassuk.”

*Imm. 3.* Qinnuteqaatip ilusissaa aamma piumasaaqatit akuersissutissamut attuumassutillit pillugit Avatangiisinut ministeri malittarisassiorsinnaavoq. Aammattaaq Avatangiisinut ministeri uuttortaanermit paasissutissat tunniunneqartarnerat pillugu malittarisassiorsinnaavoq.«

**6.** § 5 kingorna ilanngunneqassaaq:

»§ 5 a. Geodatastyrelsip paasissutissaatai sorliit pisortat oqartussaasuinit allanit, suliffeqarfinit innuttaasunillu killeqanngitsumik atorneqarsinnaasanerat Avatangiisinut ministerip aalajangissavaa. Paasissutissat taakku Geodatastyrelsip atugassiissutigissavai.

*Imm. 2.* Pisortatut oqartussat allat paasissutissanik oqartussaasut aamma Geodatastyrelsip suleqatigiinnerisigut pilersinneqartunik aamma imm. 1 malillugu avatangiisinut ministerip aalajangigaanik pigisallit, paasissutissat taakku taamaaqataanik killeqanngitsumik atugassiissutigisinnaavaat.«

**7.** § 7 kingorna ilanngunneqassaaq:

»§ 7 a. Pillaammik akiliisinneqassaaq Kalaallit Nunaanni Pinerluttulerinermik inatsit malillugu § 4 a, imm. 1-imi, oqaaseqatigiinnik siullernik unioqquitsisoq.

*Imm. 2.* Unioqquitsineq imm. 1-imi pineqartoq ingerlatseqatigiiffimmit, peqatigiffimmit, suliffeqarfimmit imminut pigisumit, aningaasaateqarfimmit assigisaanilluunniit pisimappat, taamaaneratut (inatsisitigut pisussaataasooq) pillarneqarnissamut akisussaatinneqarsinnaavoq.«

## § 2

Peqqussut una atuutilersinneqarpoq ulloq 1. januar 2016.